

Corte Superior straña cu homber cu carchi castigo serio ta trahando pa Gobierno

ORANJESTAD(AAN) -- Presidente di Corte Superior mr. de Lannoy a scual Victor Yarzagaray pa su actitud den Corte y a muistr'e riba su carchi di castigo cu no ta nada bunita. E tres Jueznan a keda asombra cu Yarzagaray ta trahando como "arbeidscontractant" pa Minister Willem Vrolijk. Mr. de Lannoy a puntr'e si gobierno ta na altura di su carchi di castigo y con bin cu e ta trahando den gobierno. Yarzagaray a bisa mr. de Lannoy cu esey ta pasa y cu tur hende mester haya e oportunidad di cambia den bida. Mr. de Lannoy a remarca cu esey no ta e caso cu Yarzagaray pasobra ta aña pasa el a bolbe maltrata un hende den Well Well Bar and Restaurant.

Corte Superior diamars mainta a trata e apelacion di Victor Yarzagaray contra sentencia di Juez di Corte den Promer Instancia. El a worde condena na un multa di 500 Florin, 2 siman di prison condicional y cu e mester paga e daño cu el a ocasiona na e persona cu ta ser calcula na mas o menos 4000 Florin. E tabatin abogado mr. Falconi pa defende pero e dia ey mr. de Lannoy a lesa un carta cu el a haya di dicho abogado kende a notifica Corte Superior cu e ta distancia su mes di e caso.

Yarzagaray a dicidi di sigui cu tratamento di e caso ya cu e ta considera cu e caso no ta nada serio. Despues a resulta cu e caso ta mas serio cu e mes a kere.

Durante tratamento di e caso a sali na cla cu dia 14 di Maart 1999 den Well Well Bar and Restaurant, Yarzagaray a dal un persona extranhero R.d B. na su cara y door di esey el a kibra su bril. Además di esey R.d B. ora el a regresa su pais mester a haci operacion cerca dentista cu a sali casi 4 mil Florin.

R.d B. su declaracion na polis ta cu riba e dia ey e tabata den e lugar y na dado momento el a mira Yarzagaray tabata molestia e muher bartender. El a lanta y bay hala Yarzagaray su atencion. E ora ey Yarzagaray a dal'e y kibra su bril. R.d B. a bay na e telefoon pa yama polis y ora e tabata yamando, Yarzagaray a bay riba dje y dal'e cu mokete na su boca. A consecuencia di esaki R.d B. me-

ster a bay hospital pa cose e capnan cu el a sufri door di e maltrato. Mr. de Lannoy a lesa e raport medico cu ta duna un relato completo di e heridanen cu R.d B. a sufri.

Yarzagaray a bisa mr. de Lannoy cu e dia ey el a drenta e lugar y a mira R.d B. ta sunchi cu un otro homber. E no a preocupa cu esaki y a bay busca su cuminda. Door cu e cuminda no tabata cla ainda, e tabata papia cu e muher y na dado momento R.d B. y su amigo a bay para su dilanti y papia coy kens cun'e.

Segun Yarzagaray, el a zwaai su man y su man a dal contra cara di R.d B. y a kibra su bril. Ora el a haya su cuminda, el a sali bay y pafor di e lugar nan a bolbe bin su tras. El a pusha R.d B. e ora ey y a sosode loke a pasa.

Segun Yarzagaray ningun momento el a dal R.d B. cu mokete ya cu su intension no tabata pa dal R.d B. cu mokete.

Aki ta caminda cu mr. de Lannoy a hala Yarzagaray su atencion muistrando ey cu loke el a haci ta algo hopi serio. Por deduci esaki for di

e raport medico y tambe for di e tratamento cu R.d B. mester a sigui cerca un dentista cu a sali casi 4 mil Florin.

Segun Yarzagaray, dicon R.d B. no a sigui tratamiento aki mes. Ningun hende no por sigura cu e gastonan realmente ta asina. E ta haya e suma aki mucho halto pa paga.

Mr. de Lannoy a bisa Yarzagaray cu e ta un persona hopi violento. El a lesa e carchi di castigo di Yarzagaray caminda por mira cu na 1980 el a worde condena pa maltrato;

- na 1983 el a worde condena pa asesinato;
- na 1990 el a worde condena pa intento di asesinato;
- na 1994 el a worde condena pa un otro caso di maltrato y awor atrobe e ta worde condena pa maltrato.

Mr. de Lannoy a puntra Yarzagaray si gobierno sa di su carchi di castigo y con por ta posibel cu e ta den servicio di gobierno cu un carchi di castigo asina. Yarzagaray a bisa mr. de Lannoy cu tur hende mester haya e chens pa cambia su bida. Juez a re-

marca cu ta obvio cu Yarzagaray no a cambia nada ya cu el a bolbe maltrata hende.

Procurador General interino ta haya legalmente proba cu Yarzagaray a dal un persona diferente biaha cu mokete na su cara. E ta haya e castigo cu Yarzagaray a haya hopi rasonabel pero no ta bay existi mas castigo sino ta pidi pa Corte Superior confirma e castigo aki cu ta 500 Florin di boet of 10 dia cera, 2 siman di prison condicional y cu e mester paga e daño cu el a ocasiona den un periodo di 6 luna.

Yarzagaray no a gusta nada loke Procurador General a existi p'e. El a hasta remarca cu con e ta bay haci paga si e mes tin gastonan cu e mester paga. Mr. de Lannoy a bis'e cu e mester a percura pa no dal hende. Door cu el a dal hende e mester sufri e consecucionan.

Corte Superior a bay delibera un rato riba e caso y despues a dicta sentencia di biaha. Nan ta haya legalmente proba cu Yarzagaray a dal e persona y a destrui su bril y a causa daño fisico. Nan

a conden'e na 500 Florin di boet y si e no paga esaki 10 dia cera, 2 siman di prison condicional cu un tempo di prueba di 2 aña y cu e lo mester paga R.d B. 3744,21 Florin mas 700 Florin di gasto di abogado. Mr. de Lannoy a stipula cu Yarzagaray mester paga e suma aki den un periodo di 6 luna. Yarzagaray no tabata contento cu e sentencia y ora mr. de Lannoy a caba di bisa e castigo, el a bira cana bay.

B.J. ARENDS & SONS INC
LIQUIDACION TOTAL DI VARIOS ARTICULO MARCA "AMERICAN STANDARD"
CU 50% DI DESCUENTO (MIENTRAS CU TIN!)
MANERA LABAMANO, LABAPLATO
BIDET, BADKUIP, ETC
PASA PERSONALMENTE NA BRENCHIE'S ANNEX
BRENCHIE'S
BRENCHIES ANNEX
TEL: 824250 FAX: 837921
"#1 DEN DESCUENTO"

ARUBA QUO VADIS!!

